



Obaveza pomoći obespravljenima (Medina)

Hatib: dr. Ali ibn Abdurrahman el-Huzejfi

10. džumadel-ula 1445. god. po Hidžri / 24. novembar 2023.

Hvala Allahu, Uzvišenom, Plemenitom, Vladaru, Svetom, uzvišenom od svakog nedostatka. Hvalim Ga i zahvaljujem Mu, slavljen neka je, na Njegovim blagodatima, onima kojih smo svjesni i onima kojih nismo svjesni. Svjedočim da nema boga osim Allaha, Jedinog, Koji nema druga, Dobročinitelja, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, koji je poslan s najboljim vjerezakonom i propisima. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu porodicu i plemenite ashabe.

Bojte se Allaha, ispunjavajte Njegova prava i prava Njegovih stvorenja. Uspjet će samo onaj ko Ga se bude bojao, a propast će onaj ko zapostavi prava i obaveze, i ko bude prelazio propisane granice i činio nepravdu.

Uzvišeni kaže: "... a onome koji se Allaha boji, On će izlaz naći i opskrbit će ga odakle se i ne nada." (Et-Talak, 2–3)

"A onome ko se bude Allaha bojao, On će preko ružnih postupaka njegovih preći i još mu veliku nagradu dati." (Et-Talak, 5)

"Onda će onome koji je obijestan bio i život na ovome svijetu više volio, Džehennem prebivalište postati sigurno. A onome koji je pred dostojanstvom Gospodara svoga strepio i dušu od prohtjeva uzdržao, Džennet će boravište biti sigurno." (En-Naziat, 37–41)

Čovjekova sreća i lijep život na dunjaluku i na ahiretu povezani su s ispunjavanjem Božijih prava i prava Njegovih stvorenja, a čovjekova nesreća, propast i vječni boravak u Džehennemu povezani su sa zapostavljanjem prava Gospodara i prava Njegovih stvorenja i nepravdom prema njima. Uzvišeni kaže: "A ona sela i gradove





smo razorili zato što stanovnici njihovi nisu vjerovali i za propast njihovu tačno vrijeme bismo odredili." (El-Kehf, 59)

Svijet opstoji na vjerovanju, korisnom znanju, dobrom djelu i pravdi, a propada zbog grijeha, nemoralna i nepravde čovjeka prema čovjeku.

U cilju popravljavanja i unapređenja čovjeka i njegove zaštite od nepravde, koja uništava život, Allah, džellešanuhu, propisao je zakone, dozvolio ono što je halal i zabranio ono što je haram, detaljno precizirao dužnosti, objasnio prava i učinio ih obaveznim kako bi čovjek postigao sreću na ovom svijetu i nakon smrti, pa je tako propisao potpomaganje u dobročinstvu, samilost, solidarnost, pomaganje obespravljenima, činjenje dobra i ustezanje od zla i uznemiravanja drugih, jer život može opstojati i funkcionisati samo na tim vrijednostima.

Numan ibn Bešir, radijallahu anhumu, prenosi da je Allahov Poslanik, sallallahu alejhi ve sellem, rekao: "Primjer vjernika u njihovoj međusobnoj ljubavi, samilosti i saosjećanju je kao primjer jednog tijela: kada oboli jedan dio tijela, i ostali dijelovi pate od nesanice i groznice." (Buhari i Muslim)

Ibn Omer, radijallahu anhumu, prenosi da je Allahov Poslanik, sallallahu alejhi ve sellem, rekao: "Musliman je muslimanu brat, ne čini mu nepravdu i ne ostavlja ga na cjedilu. Ko se bude brinuo o potrebama svoga brata, Allah će se pobrinuti za njegove potrebe. Ko od muslimana otkloni bilo kakvu nevolju, Allah će od njega otkloniti neku od nevolja na Sudnjem danu." (Ebu Davud, Tirmizi i Nesai)

Ebu Musa el-Eš'ari, radijallahu anhu, prenosi da je Allahov Poslanik, sallallahu alejhi ve sellem, rekao: "Vjernik je vjerniku poput građevine koja podupire jedna drugu." (Buhari i Muslim)

Džabir, radijallahu anhu, prenosi da je Vjerovjesnik, sallallahu alejhi ve sellem, rekao: "Nema nijednog muslimana koji ostavi na cjedilu drugog muslimana, u situaciji u kojoj će biti pogažena ili oskrnavljena njegova čast, a da Allah njega neće ostaviti na cjedilu u onim situacijama u kojima bi volio da mu On pomogne. Nema nijednog muslimana koji pomogne drugog muslimana, u situaciji u kojoj će biti pogažena ili





oskrnavljena njegova čast, a da Allah njemu neće pomoći u onim situacijama u kojima bi volio da mu On pomogne." (Ebu Davud)

Uzvišeni kaže: "Vjernici i vjernice su zaštitnici jedni drugima." (Et-Tevba, 71)

Musliman je uz muslimana u teškoći i lahkoći, u brigama i iskušenjima. Uzvišeni kaže: "Samo su vjernici braća." (El-Hudžurat, 10) I, Uzvišeni kaže: "Ovaj vaš ummet jedan je ummet, i Ja sam vaš Gospodar, i samo se Meni klanjajte." (El-Enbija, 92)

Huzejfa, radijallahu anhu, prenosi da je Vjerovjesnik, sallallahu alejhi ve sellem, rekao: "Ko ne brine o muslimanima, njima i ne pripada. Ko osvane i omrkne a ne bude imao iskren odnos prema Allahu, Njegovom Poslaniku i vođama muslimana i ostalim muslimanima, njima i ne pripada." (Taberani)

Ummete islama, o vi kojima je Allah naredio samilost, saosjećajnost, međusobnu ljubav i pomaganje, pomozite svoju potlačenu braću, djecu, žene i starce u Gazi, koji prolaze kroz velika iskušenja i nevolje. Pomozite ih dovom, hranom, lijekovima, imetkom i odjećom, ispunite njihove potrebe, otklonite od njih nevolje i nastavite ih pomagati dobrovoljnim prilozima. Uzvišeni Allah kaže: "Što god vi udijelite, On će to nadoknaditi, On najbolje opskrbljuje." (Saba, 39) Solidarišite se s njima, oni kod vas imaju svoje pravo, i pomozite ih.

Palestinci nemaju nikoga drugog osim Allaha i islamski ummet, a prava muslimana, od zla njihovih duša, može zaštititi samo bogobožnost i vjerovanje u Allaha. Uzvišeni kaže: "Allah je zaista na strani onih koji se Njega boje i grijeha klone i koji dobra djela čine." (En-Nahl, 128)

Onaj uz koga je Allah, za njega se ne treba bojati. S druge strane, muslimane od zla njihovih neprijatelja može zaštititi samo strpljivost i bogobožnost, kao što kaže Uzvišeni: "I ako budete trpjeli i ono što vam se zabranjuje – izbjegavali, njihovo lukavstvo vam neće nimalo nauditi. Allah, zaista, dobro zna ono što oni rade." (Ali Imran, 120)





Bojte se Allaha, iskreno čineći djela u Njegovo ime i radi Njegove nagrade – gledanja u Njegovo plemenito lice na Sudnjem danu – On će vaša djela očistiti, uvećati vašu nagradu i pomoći vam u vašim poslovima.

O muslimani, svi se čvrsto Allahovog užeta držite, ne razjedinjujte se, i uzmite pouku iz prethodnih događaja. Muslimani se moraju čuvati razjedinjenosti i razilaženja, a obaveza im je da budu jedinstveni i okupljeni oko zajedničkih interesa. Razilaženje i razjedinjenost slabe i ugrožavaju vjeru i domovinu, a u jedinstvu su snaga i ponos. Allahov je nepromjenjivi zakon i Njegova milost da će pomoći one koji budu ustrajni, strpljivi i čvrsto ubijedeni u Njegovo obećanje. Uzvišeni kaže: "Reci: 'O svemu odlučuje samo Allah!'" (Ali Imran, 154)

U hadisu se kaže: "Znaj da pomoć dolazi sa strpljivošću, spas s nedaćom i last s mukom." (Ahmed i Tirmizi) Uzvišeni kaže: "O vjernici, budite strpljivi i izdržljivi, na granicama bdijte i Allaha se bojte, da biste postigli ono što želite!" (Ali Imran, 200)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

